

四庫全書

史部



欽定四庫全書

欽定續通志卷五百三

外戚傳

宋二

王貽永

李昭亮

李用和  
璋

李遵勗

端懿  
端慤

端愿  
評

曹侂  
偕  
評  
誘

高遵裕

遵惠  
公紀

士林  
世則

向傳範  
經  
宗回  
綜  
宗良

張敦禮

任澤



王貽永字季長溥之孫也性清慎寡言頗通書不好聲伎十餘歲時舅魏咸信見而奇之咸平中尚鄭國公主授右衛將軍駙馬都尉累遷右監門衛大將軍獎州團練使求外補得知單州徙徐州河決滑州徐大水貽永作隄城南以禦之改衛州團練使進懷州防禦使知澶定二州徙成德軍會有告曹汭變者貽永奏治之歷知鄆州州自咸平中徙城而故治為通衢介梁山春夏多水患貽永相度地勢為築東西道三十餘里民便之復



徙定州又徙成德軍擢同知樞密院事改副使加宣徽  
南院使進樞密院使久之拜同中書門下平章事遂加  
兼侍中徙節鎮海以疾求罷乃罷侍中徙彰德節度使  
至和初復以疾辭拜尚書右僕射檢校太師卒贈太師  
中書令謚康靖當時無外姻輔政者貽永能遠權勢在  
樞密十五年迄無過失人稱其謙靜子道卿

李昭亮字晦之明德太后兄繼隆子也補東頭供奉官  
出入禁中累遷管勾軍頭引見司兼三司衙司軍士有



逃死而冒請官廩者數百人昭亮按發之歷永興路馬步軍副都指揮使并代州路副都總管安撫招討副使徙真定路都總管保州兵叛殺官吏詔遣王果招降之叛者乘埤呼曰得李步軍來我降矣於是遣昭亮昭亮至相率開城門降改淮康軍節度觀察留後知定州歐陽修言昭亮入保州以叛卒女口分隸諸軍有私入其家者置不問拜武寧軍節度使代李用和為殿前副都指揮使昭亮本將家子習軍中事既統宿衛政尚嚴多所



建請萬勝龍猛軍捕博爭勝負撤屋椽相擊士皆惶駭  
昭亮捕斬之杖其主者諸軍股慄帝祠南郊有騎卒亡  
所挾弓會赦當釋去昭亮曰宿衛不謹不可貸卒配隸  
下軍禁兵頓肅拜同中書門下平章事判大名府仁宗  
書李昭亮親賢勲舊命其子惟賢持以賜徙定州數言  
老疾不任事改天平彰信泰寧昭德軍節度使卒贈中  
書令謚良僖昭亮為人和易練習近事于吏治頗通敏  
善委任僚佐以故數更藩鎮無他過子惟賢字寶臣以



父蔭為三班奉職累遷西上閤門使尋領高州刺史知  
莫州州倉粟陳腐戍兵大譟弗肯受州人恐惟賢馳往  
諭曰邊兵衆則積粟多且積久能無腐乎欲盡取新則  
陳者何所歸遂斬首惡一人流十人軍中帖然召還提  
舉諸司庫務領滎州團練使知冀州會遷補禁軍自隸  
籍後犯賊汚者皆絀為下軍惟賢曰武士何可責以廉  
節且抵罪在昔今不可以新令繩之帝為更其制徙恩  
州後遷四方館使卒惟賢善宣辭令習朝儀仁宗頗愛



之

李用和字審禮章懿皇太后弟也少窮困居京師鑿紙  
錢為業劉后使兄美訪求宸妃親屬得之於民間奏為  
三班奉職累遷右侍禁閤門祇候權提點在京倉草場  
考城縣兵馬都監太后崩遷禮賓副使領八作皇儀二  
司遷禮賓崇儀使賀州刺史妃追尊太后改遷陵寢領  
捧日天武兵護梓宮明年春詔乘傳行太后陵還授寧  
州刺史累擢永清軍節度觀察留後改真定府定州路



舊制公使錢得私入用和悉用為軍費歷侍衛親軍步  
軍馬軍副都指揮使拜建武軍節度使殿前副都指副  
使以老乞罷軍職拜宣徽北院使逾月改彰信軍節度  
使同中書門下平章事景靈宮使進兼侍中初未有居  
第詔寓館芳林園用和固辭又假以惠寧坊之官第并  
日給官舍僦錢五千卒贈太師中書令隴西郡王諡恭  
僖初仁宗以太后不逮養故外家褒寵特厚用和列位  
將相能小心靜默推遠權勢論者以此稱之子璋瑋珣



璋字公明以恩補三班借職積官為天平軍節度觀察  
留後知澶州護塞高胡會河漲記言水且至璋據聽事

自若人心乃安河亦不溢徙曹州觀察使

按東都事畧  
河決澶淵坐

降邢州觀察使復  
為留後宋史不載

累遷武勝軍節度使殿前都指揮使

仁宗書忠孝李璋字并祕書賜之帝崩執政欲增京城  
甲士璋曰例出累代不宜輒易時禁衛相告乾興故事  
內給食物中有金既而果賜食眾視之無金以為言璋  
曰天子未臨政已優賞汝何功復云云敢喧者斬眾乃



定以武城軍節度使知鄆州京東盜白日殺縣令掠人  
道中璋信賞罰擒捕盜為衰止歲大雨水競以船筏邀  
利多溺死者璋一切籍之約所勝載如黃河法發卒城  
州西關調夫脩路數十里夾道植柳人指為李公柳知  
鄧州坐失舉改節振武軍知郢州還朝道卒贈太尉謚  
良惠

按此下原有李瑋傳惟載其遷尚克國公主朴陋與主不協別無事蹟今刪

珣字公粹以蔭為閤門祗候累遷均州防禦使知相州  
賜御製詩飛白字寵其行使契丹預釣魚會獲多契丹



遺以金器使還悉上之更賜黃金及李珣忠孝字熙寧  
中遷宣州觀察使知潁州哲宗初進泰寧軍留後提舉  
萬壽觀故事正任遇覃恩止移鎮唯宗室乃遷官至是  
珣與李端慤皆特遷戚里以覃恩遷官自此始復知相  
州卒

李遵勗字公武崇矩孫繼昌子也少學騎射及長好為  
文詞舉進士大中祥符間尚萬壽長公主初名勗帝益  
遵字升其行為崇矩子授左龍武軍駙馬都尉賜第永



寧里主下嫁而所居堂甃瓦甃多為鸞鳳狀遵勗令鏡  
去主服有龍飾悉屏藏之帝歎喜領澄州刺史坐私主  
乳母謫均州團練使徙蔡州踰年起為太子左衛率府  
副率復左龍武軍將軍領宏州團練使真拜康州團練  
使時繼昌官刺史遵勗請班其下許之後繼昌守涇州  
暴感風眩遵勗馳省不俟命帝遣使令乘驛赴之既還  
上表自劾帝慰諭之遷澤州防禦使又遷宣州觀察使  
求補郡自試出知澶州會河水溢將壞浮梁遵勗督工



徙七日堤成遷昭德軍節度觀察留後拜寧國軍節度使徙鎮國軍知許州水軍多不練習遵勗命部校按劾拔去十七八初天聖間章獻太后屏左右問曰人有何言遵勗曰人言天子既冠太后宜以時還政太后曰我非戀此但帝少內侍多恐未能制之也嘗上三說五事以論時政太后乳母晉國夫人林氏干預國事太后崩遵勗密請置之別院其補助多類此所居第園池冠京城延一時名士大夫與宴樂師楊億為文億卒為制服



及知許州奠億墓慟哭而返又與劉筠相友善筠卒存恤其家卒贈中書令諡曰和文子端懿端愿端懿

端懿字元伯性和厚喜問學頗通陰陽醫術星經地理七歲授如京副使侍真宗東宮稍長出入宮禁如家人累遷濟州防禦使羣牧副使杜衍擇外戚子弟試外官以端懿知冀州為政循法度轉運使移州捕妖人李教教已死恩州王則據城叛人有言教不死在賊軍中遂降單州團練使知均州改滑州兵馬鈐轄賊平實無李



教者乃以為汝州防禦使歷知鄆州兼京東西路安撫使大水民饑發廩以賑置弓手局教以戰鬪遂如精兵治汝陽堤百餘里以却水患民便之尋除寧遠軍節度使不拜以留後知澶州赴任數月卒贈侍中謚良定端懿能自刻厲聞善士傾身下之甚得名譽

端愿字公謹七歲授如京副使累遷恩州團練使仁宗以歲旱慮囚放宮女端愿上言縱釋有罪小人之幸放宮女為宦者專制反失所歸何以弭災變進邢州觀察



使鎮東軍留後知襄郢二州本路轉運使以獻羨財被  
賞端愿言常賦三折其民不堪帝怒奪其賞申折變之  
禁移廬州富弼謂曰肥上之政何以減于襄陽端愿曰  
被官喜事飾厨傳以干名則譽者至更事既久知抑豪  
彊制猾吏故毀隨之弼深然其言英宗初同提舉在京  
諸司庫務求對勸上躬攬權綱以係人心不宜退託失  
天下望拜武康軍節度使知相州歸除醴泉觀使神宗  
遣使就其家錄取章奏賜詔褒之請老以太子少保致



仕哲宗嗣位進太子太保元祐六年卒贈開府儀同三司子評

端慤字守道官左藏庫使累遷東上閤門使幹辦三班院嘗侍宴羣玉殿仁宗獨賜珠花飛白字知邢冀衛三州至蔡州觀察使元祐中以安德軍留後卒贈昭德軍節度使謚恭敏兄端懿在嘉祐時嘗密疏言事人無知者元豐間端慤進對袖舊橐上之神宗嘆曰近世賢戚也



許字持正由東頭供奉官八遷皇城使授西上閤門使  
樞密都承旨出使陝西河東還言城囁兀非便乞速毀  
撤解一路之患又言王師征安南而取卒于西北使蠻  
聞之得以窺我所論事頗多然天資刻薄多布耳目采  
聽外事自効以為忠以榮州刺史出知潁州還幹當三  
班院副韓縝報聘契丹且分畫河東地界凡二年乃決  
進成州團練使知蔡州卒贈冀州觀察使許少涉書傳  
嘗以公主遺奏召試學士院改殿中丞意不滿辭之後



二年再召試復止遷一官愈不悅至上書辨論及卒人  
無憐者

曹侑字公伯

東都事畧作字伯容

韓王彬之孫慈聖光憲皇后弟

也性和易美儀度通音律善奕射喜為詩自右班殿直  
累進殿前都虞侯安化軍留後出知澶青許鄆州歷建  
武保靜保平軍節度使同中書門下平章事景靈宮使  
加兼侍中封濟陽郡王神宗每咨訪以政然退朝終日  
語不及公事帝謂大臣曰曹王雖用近親貴而端拱寡



過善自保真純臣也進對未嘗名元豐中以疾告既愈入謝帝曰舅久不覲太皇太后宜少憩內東門朕當自啟已而召入歷上下儒釋道五閣大椿蟠桃亭再升殿

乃退

按東都事畧神宗召侑至便殿同詣慶壽宮慈聖愕然遽止之曰外戚自來未有輒入禁掖者安可

以我開其端帝曰卿以慰骨肉之情他人固不可也時左右已預辦宴具帝親捧觴慈聖自酌以授侑侑跪飲鈞天盛奏丙夜極歡而罷宋史慈聖尤獻皇后傳帝侑侑諸后間少焉帝先起若令侑得伸親親之意后遽曰此非汝所當得留趣遣出以護國軍節度使司徒兼中皆載此事而各有不同

書令

按東都事畧國朝以來異姓未有兼中書令者贈官則有之生除中書惟侑而已為太一



宮使慈聖喪終請郡帝日時見舅如面慶壽宮奈何欲  
遠朕即城南為園池給八作兵庀役疏惠民河水灌之  
且將為築三百楹第固辭乃止哲宗即位加少保卒贈  
太師追封沂王從弟偕子許誘

偕字光道少讀書知義以節俠自喜為許州都監幕客  
史沆傾險不法上下畏之偕從容置酒對客數沆十罪  
將擊殺之沆起拜謝為之斂迹累遷東上閤門使知雄  
州議者欲廢塘泮為田偕曰何承矩李允則營此累年



所以限契丹廢之不可進華州防禦使知相州徙河陽  
總管卒嘗從梅堯臣學詩堯臣稱之為序其詩

許字公正以父任累官至引進使知審官西院積遷溫  
州防禦使元祐中提舉萬壽觀弓外為真定路鈐轄哲  
宗以為總管徽宗即位遷相州觀察使歷龍神衛捧日  
天武都指揮使殿前都虞候馬步軍副都指揮使寧遠  
軍留後平海軍節度使佑神觀使使契丹者四館伴者  
十二在閤門十二年預修儀制多所增損性喜文史書



有指法尤善射左右手如一夜或滅燭能中伴契丹使者射嘗雙破的客驚竦在戚里號為沉厚卒贈開府儀同三司

誘字公善以蔭至左藏庫副使遷閤門通事舍人元祐中以東上閤門使為真定府定州路兵馬鈐轄遷文州刺史使契丹至其宮門館客者下馬邀誘同入誘曰北朝使至及朝堂門兩朝積好久無妄生事卒乘馬入使還為樞密副都承旨徽宗時進都承旨歷慶州團練使



州防禦晉州觀察使保慶軍留後進安德軍節度使醴泉觀使與兄許同日拜立雙節堂于家性謹密習熟典故卒贈開府儀同三司謚忠定

高遵裕字公綽忠武軍節度使瓊之孫也以蔭累遷供備庫副使鎮戎軍駐泊都監夏人寇大順城諒祚中夫遁會英宗晏駕遣遵裕告哀抵宥州夏人遣王盭以吉服迎遵裕切責之遂易服語及大順城事盭曰剽掠輩耳遵裕曰若主扶傷而遁斯言非妄耶夏人以為辱亟



遣人代對曰王人蔑視下國敵邑雖小控弦十數萬亦能躬執櫜鞬與君周旋遵裕瞋目曰主上天縱神武毋肆狂蹶以干誅夷時諒祚覘於屏間搔手使止神宗聞而嘉之擢知保安軍橫山豪欲向化帝使諭种諤圖之諤遂取綏州帥怒諤擅發兵欲正軍法諤懼稱得密旨於遵裕故諤被罪遵裕亦降為乾州都監遷通事舍人主管西路羌部駐古渭砦分所部羌兵為三等教以軍法熙寧初副王韶為秦鳳路沿邊安撫尋以古渭為通



遠軍命知軍事明年持附順羌部圖籍及繪青唐武勝  
形勢入獻擢引進副使帶御器械俾歸治師師至野人  
關羌人旅拒引親兵一鼓破之進營武勝城下羌衆逃  
去遂據其城詔建為鎮洮軍又命知軍事尋以熙河洮  
岷遠通為一路進西上閣門使榮州刺史充總管復知  
通遠軍詔欲取河州遵裕曰古渭舉事先建堡砦以漸  
而進故一舉拔武勝今兵糧未備一旦越數舍圖人之  
地使彼阻要害我軍進退無所矣詔不聽檄使守臨洮



韶攻河州果不克帝善其議令專管洮岷疊巖未款附者逾龍珂地有鹽井遂築鹽川砦轄果且率諸羌脅青唐欲援邊詔遣張玉攻討遵裕曰青唐無罪第為生羌所脅耳遣裨將與龍珂率衆禦之青唐人見龍珂泣訴轄果且知不附已潰去從韶取岷州下之令士衆曰生獲老幼與得級同全活者以數萬捷聞加岷州刺史明年羌乘景思立之敗圍河岷二州道路不通者幾月或請退保遵裕不許乃登西門命將縱擊別選精騎由南



門諜而出合擊之羌敗走以功進團練使龍神衛都指揮使知熙州坐薦張穆之罷知潁州徙慶州又坐事黜知淮陽軍元豐四年復知慶州詔與諸路討夏國請濟師得東兵十一將騎不足用以羣牧馬益之又令節制涇原兵劉昌祚先至靈州幾得城遵裕嫉之故不用其計遂以潰歸貶郢州團練副使哲宗即位復右屯衛將軍主管中獄廟卒贈永州團練使紹聖中加奉國軍節度觀察留復從弟遵惠



遵惠字子育以蔭為供奉官熙寧中試經義中選換大理許事歷三班院主簿軍器丞元祐初上疏言法度之張事有當否如先帝所設施未可輕議擢太僕少卿累遷工部侍郎以集賢殿修撰知鄆州河南潁昌府加寶文閣待制知成德軍召為戶部侍郎以龍圖閣學士知慶州卒贈樞密直學士方宣仁后臨朝繩檢族人一以法度遵惠躬表率之人無間言亦能遠嫌自保故不罹紹聖之禍從姪士林



士林字才卿宣仁聖烈皇后之弟也累官內殿崇班殿直英宗書謹守法律四字誨之曰能此則為良吏矣喜儒學涉閱經史通大義尤有巧智嘗監揚州召伯牘稅本舊用火印士林改刃其印文鑿以為識尤簡便傍郡皆效焉卒贈德州刺史神宗立加贈昭德軍節度使紹興初追封普安郡王子公紀

公紀字君正歷閭門祇候通事舍人累進寧州刺史團練使永州防禦使集慶留後性儉約珍異聲伎無所好



奉祿多以給諸族得任子恩均及孤遠卒贈感德軍節度使謚懷僖紹興初追封新興郡王子世則

世則字仲貽幼以恩補左班殿直至內殿崇班閤門祇候後除親衛郎以通經典轉內殿承制累遷康州防禦使知西上閤門事宣和末金泛使至命掌客記問該洽應對有據帝聞悅之自是掌客多命世則金人軍城下又命往使還進秩二等遷知東上閤門使金人邀宰執親王詣軍前議事康王請行遂除計議副使以從康王



使河北改華州觀察使充叅議官當艱難中常在左右  
寢處不少離大元帥府建改元帥府叅議請布檄諸路  
以定人心承制轉越州觀察使高宗即位除保靜軍承  
宣使提舉萬壽觀令編類元帥府事迹付史館召為樞  
密都承旨兼提舉京畿監牧再提舉萬壽觀居温州積  
奉二萬緡因請以裨郡費帝每念宣仁外家班秩無顯  
者拜為感德軍節度使進開府儀同三司奉朝請賜第  
臨安除景靈宮使兼判温州以病丐罷紹興十四年進



少保卒贈太傅謚忠節

向傳範字仲模以蔭為衛尉丞娶南陽郡王惟吉女安  
福縣主改內殿崇班歷知相思邢三州入管幹客省閤  
門皇城司知陝鄆二州兼京西京路撫使諫官楊繪言  
傳範領安撫使無以杜外戚僥求之源文彥博曰傳範  
累典郡非緣外戚神宗曰得諫官如此言甚善可以止  
他日妄求者以密州觀察使卒贈昭德軍節度使謚惠  
節傳範宰相子聯戚里所至有能稱以橐中貲千餘萬



葬族人在殯者六十四喪從姪經綜

經字審禮以蔭至虞部員外郎神宗為潁王選經女為妃改莊宅使帝即位妃為皇后進光州團練使以濰州防禦使知陳州歲中閱囚活重辟三人西華令掠人至死吏畏莫敢言經得其情卒窮治如法歲大雪輒弛公私僦錢以寬民又斥公使錢歸有司以供享勞賓客軍師之用知河陽會旱蝗民乏食先以圭田租入振救之富人爭出粟多所濟活徙徐州遷明州觀察使召還提



舉景靈宮進定國軍留後復出知青州未踰歲得疾還卒于淄州贈侍中謚康懿經所至勤吏治事皆自省決頗欲以才見於用故數請外補嘗因太祖忌日百官班開元殿下后召經見行幄勉以盡忠朝廷經亦以善事三宮為言不及其家事子宗回宗良

綜字君章知歙縣籍閭里惡少年有盜發用以推迹輒得通判桂常二州知隨鼎漳汾密棣沂七州沂阻山多盜綜請用重法繩禁歲大辟減半兵久情會初置提舉



教之急衆不悅監兵夜排闥告變綜就寢自若明日大  
閱嚴號令賞罰卒亦無事性寬裕善治劇於姦惡不少  
恕累官中散大夫卒

宗回字子發累官相州觀察使徽宗立進彰德軍留後  
歷安國保信鎮南保平軍節度使檢校司空封永陽寧  
海安康漢東郡王開府儀同三司崇寧初有告其陰事  
者鞠實削官爵踰年盡還故官宗回少驕恣有小才嘗  
權羣牧都監數以蕃息被賞出知蔡州擒劇賊殲其黨



數歲饑發廩興力役饑者得濟而官舍帑廩一新欽聖  
后服除起奉朝請卒贈檢校少師諡榮縱

宗良字景弼歷秀州刺史利州觀察使昭信軍留後奉  
國清海鎮東武寧寧海軍節度使永嘉郡王開府儀同

三司欽聖臨朝陳瓘論其與蔡京相結

按東都事畧蔡京與宗良交結

欽聖還政宗良尚預政事及預政事亦能恪共自守宣  
故為陳瓘疏論與此異

和中卒贈少保

東都事畧母董氏年九十封燕國太夫人宣和元年卒明年起復宗良制曰念

先后之同氣惟仲舅  
之獨存宗良固辭



張敦禮熙寧元年選尚英宗女祁國長公主授左衛將軍駙馬都尉遷密州觀察使元祐初疏言變法易令始於王安石成於蔡確近者退確進司馬光所得多矣進武勝軍留後章惇為政言敦禮醜正朋邪詆毀先烈引譽罪首謂當褒崇欲其黨儔盡見收用乃責授左千牛衛大將軍勒止朝參徽宗立有司奏審恩賜帝與欽聖后皆以為當與惇等執前疏欽聖曰戚里何必預知朝廷事當時罰亦太重矣復和州防禦使進保信軍留後



崇寧初拜寧遠軍節度使諫官王能甫言敦禮詆毀盛德罪大謫輕今復與節鉞無乃傷陛下紹述之志乃奪節仍為集慶軍留後大觀初復節度寧遠軍徙雄武卒贈開府儀同三司

任澤字天錫仙遊夫人母弟也英宗入繼大統授西頭供奉官神宗時累遷皇城使領昌州刺史護仙遊樞遷祔濮園真拜嘉州刺史卒贈崇信軍節度使謚恭僖澤起田里際會恩寵能自安繩檢帝欲廣其居固辭當任



子弗請其篤謹如此

欽定續通志卷五百三



欽定四庫全書

欽定續通志卷五百四

外戚傳

宋三

孟忠厚

韋淵

錢忱

邢煥

吳益  
蓋

李道

鄭興裔

楊次山

孟忠厚字仁仲隆祐太后兄追封咸寧郡王彥弼子也



后退居瑤華宮哲宗恩眷不衰故忠厚得以仕進宣和中官至將作少監靖康元年知海州召權衛尉卿金人圍城后宫火出居忠厚家繇是免北遷金兵退張邦昌迎后聽政后遣忠厚持書遺康王王即位將迎后授忠厚徽猷閣待制提舉一行事務尋兼幹辦奉迎太廟神主事帝幸揚州除顯謨閣直學士臺諫交章論列帝以太后故難之太后聞即命易武秩遂授常德軍承宣使幹辦皇城司未幾奉太后幸杭州苗傅亂平授寧遠軍



節度使尋奉太后幸南昌歸至越以母憂解職頃之以  
太后祔廟恩起復鎮海節度使開府儀同三司及太后  
大祥封信安郡王充禮儀使奉神御幸温州紹興九年  
判鎮江府改判明婺二州兼安撫使又判紹興兼修奉  
攢官事加少保三梓官歸充迎護使及營佑陵秦檜當  
為總護使憚往乃除忠厚樞密使以代其行檜與忠厚  
僚壻也然心實忌之山陵事畢忠厚欲歸樞密府檜諷  
言路引故事論列遂判福州時海寇猖獗帝憂忠厚不



能弭其患改判建康府又改判紹興府會郊赦加恩謝  
表有本無時才出為世用語中丞詹大方希檜意因論  
其輕侮罷為醴泉觀使檜死召還行在授保寧軍節度  
使判平江遷紹興復充萬壽觀使提舉秘書省二十七年  
卒贈太保忠厚奉昭聖太后訓避遠權勢不敢以私干  
朝廷明受之變太后垂簾忠厚乞裁節本家恩澤秦檜  
當國親姻扳援以進忠厚獨與之忤自越入見語所善  
王銍曰忠厚與檜雖有親好每懷疑心今欲求一不傷



時忌對劄銓教之但言乞免提舉學事而已然亦見廢  
帝以太后擁佑功故眷忠厚特優既奉內祠金使至特  
命押班且令月過局如宰執例及卒三子皆除直秘閣  
韋淵顯仁太后季弟也靖康末官至拱衛大夫忠州防  
禦使勾當軍頭引見司張邦昌遣淵持書遺康王於濟  
南王即位遷親衛大夫寧州觀察使知東上閤門事言  
橫行五司尚未遵元豐舊制乞併引進司歸客省東西  
上閤門以省冗費從之遂命同管客省四方館閤門事



性暴橫不循法度帝慮其有過難於行法遂遷福建路副總管引疾丐祠許之久之落階官除德慶軍節度使召赴行在除開府儀同三司太后將入境封平樂郡王逆於境上歸即令致仕又詔奉朝請遷少師淵在內不得逞乞致仕任便居住從之未幾帝恐其肆橫復詔還居賜第從太后朝景靈宮出言詆毀詔侍御史余堯弼鞠治責授寧遠軍節度副使袁州安置數年復故職累遷太保太傅卒贈太師子三人訊謙謹謙好學能詩官



至建康軍節度使譙子璞淳熙末仕至太府少卿高宗崩擢司農少卿為金國告哀使錫宴不肯用樂及入見令吉服入璞又不可乃以凶服見紹熙初除授明州觀察使十年不遷寧宗嘉其恬退授清遠軍節度使致仕卒贈太尉

錢忱字伯誠吳越王俶五世孫父景臻尚仁宗第十女秦魯國大長公主生忱神宗賜名除莊宅副使騎都尉帝嘗諭景臻曰主賢宜有子為擇嘉配娶唐介孫女又



晁迥外孫忱從二家遊伯父勰在翰苑因得識一時名  
卿徽宗時為邕州觀察使累除瀘州節度使欽宗加檢  
校少保尋納節高宗立復拜檢校少保瀘州節度使中  
太一宮使御書忠孝之家四字賜之進開府儀同三司  
以秦魯主終喪除少保封榮國公遷少師仍舊節致仕  
給真奉紹興三十一年卒贈太師子端禮自有傳

邢煥字文仲開封人高宗后父初以父任調汜水縣主  
簿累官知開封府陽武縣都大提舉開德大名府堤埽



歷開封府七十儀曹靖康初主管亳州明道宮高宗即位擢光州觀察使除樞密都承旨煥屢奏馬伸言事切當宗澤忠勞可倚黃潛善汪伯彥誤國其言多所裨益遷保靜軍承宣使苗劉之變煥自度不能爭迺病免兼提舉萬壽觀求去改江州太平觀徙居忠州紹興二年入對首陳川陝形勢利害請幸荆南分兵以圖恢復凡數百言帝甚嘉之復以為都承旨引疾不拜擢慶遠軍節度使提舉洞霄宮煥涉學有文節儉自持未嘗恃恩



私請識者取焉是年卒贈開府儀同三司諡恭簡加贈

少師追封嘉國公

按此下原有潘永思傳係潘賢妃之叔無事蹟足錄今刪

吳益字叔謙益字叔平俱憲聖皇后弟也益建炎末以

恩補官累遷幹辦御輦院帶御器械益紹興五年以恩

補官累遷宣贊舍人帝與后皆喜翰墨故益益兄弟師

法之亦有書名后受冊推恩益加成州團練使益加文

州刺史帝為置皇后宅大小學教授以王鑑為之鑑明

經善訓導益益折節事之益娶秦檜長孫女又與王繼



先交相薦引故三家姻族皆躡美官益歷官至保康軍  
節度使加太尉儀同三司初以檜故授文資直秘閣累  
加數文閣待制中丞湯鵬舉言益以庸瑣之才恃親昵  
之勢乞褫職名以示至公帝謂鵬舉所論切當然朕於  
真檜日諭其妻子許以保全今若遽出其壻則傷恩臣  
僚無得更有論列自是不復遷顯仁太后葬為攢宮總  
護使始進少保孝宗嗣位進少傅又進太師封太寧郡  
王乾道七年卒謚莊簡追封衛王蓋官至武寧軍節度



使累加太尉開府儀同三司少保封新興郡王乾道二年卒贈太傅追封鄭王益子琚習吏事乾道九年特授臨安府通判後歷尚書郎部使者換資至鎮安軍節度使復以才選除知明州兼沿海制置使寧宗初得祠奉朝請尋知鄂州再知慶元府位至少師判建康府兼留守卒方孝宗崩光宗以疾不能執喪大臣請太后垂簾冊立寧宗琚言於后曰垂簾可暫不可久后遂以翌日徹簾嘗使金人嘉其信義琚死後宋屢遣使議和不



合金人言南使中惟吳琚言可信琚弟璠仕至保靜軍節度使蓋子環亦至昭化軍節度使

李道字行之相州人光宗后父初道與兄旺聚衆歸宗澤澤因事斬旺命道掌其軍澤卒道引軍依襄陽鎮撫使桑仲仲以為副都統制兼知隨州奏于朝授武義郎閤門宣贊舍人仲為霍明所殺道與統制李橫率兵縞素圍明於郢明亡去劉豫遣人持書招道道不從執其使以聞詔嘉獎之豫怒遣將攻道道拒破之除鄧隨州



鎮撫使兼知鄧州時李橫已命別將守鄧道憚橫不敢受遂命仍知隨州樞密院以道能察軍情詔領榮州團練使胡安中守唐州勢孤不能自立遂附豫道招之復來歸會李成入寇道與橫俱棄鎮南至江州詔道屬岳飛為選鋒軍統制入唐州擒偽將除唐鄧州襄陽都統制從飛收復襄陽等郡累官武勝軍承宣使御前諸軍統制武興蠻楊再興連歲寇掠道破其衆擒再興及其二子遷保寧軍承宣使羣盜朱持等聚桂陽詔道移



軍衛州經理道遣高仲等擊平之落階官加龍神衛四  
廂都指揮使遷鎮南軍承宣使金將渝盟道以所部戍  
荆南帥臣劉錡召奏事道代為御前諸軍都統制金將  
劉士萼屯光化境道掩擊焚其舟士萼遁去尋與鄂帥  
不協罷踰年起授捧日天武四廂都指揮使知荆南府  
隆興初為湖北諸司所劾罷久之再為湖北副總管及  
卒贈太尉慶遠軍節度使謚忠毅后既貴進封楚王孫  
孝友孝純皆至節度使



鄭興裔字光錫初名興宗顯肅皇后外家三世孫也曾祖神封樂平郡王祖翼之陸海軍節度使父蕃和州防禦使興裔早孤叔父藻以子字之藻沒解官致追報之義初以后恩授成忠郎充幹辦祇候庫聖獻后薨充攢宮內外巡檢累至江東路鈐轄乾道初建康留司請治行宮備巡幸興裔奏勞人費財乞罷其役且言都統及馬軍帥皆非其人徙福建路兵馬鈐轄過關入見詢以守令臧否興裔條析以對帝曰卿識時務習吏事行當



用卿會復置武臣提刑就命為之加遙領高州刺史邵  
縣積玩檢驗法廢興裔勑為格目分界屬縣吏不得行  
其姦因著為令建劔汀邵鹽筴屢更漕臣請易綱運為  
鈔法興裔極言其不可海寇倏去忽來調兵常無及請  
置澳長寇至徑率民兵禦之又言禁兵事藝不精多充  
私役乞行禁止尉以捕盜改秩多偽當加審實帝嘉之  
詔加成州團練使時聞金欲敗盟召興裔為賀生辰使  
以覘之使還言無他卒如所料累差浙東西江東提刑



請祠歸尋詔知閤門事兼幹辦皇城司樞密副都承旨  
除均州防禦使再使金還遷潭州觀察使復請祠起知  
廬州卻鄰道互送禮移知揚州按籍見前所卻者有出  
無歸奏嚴其禁揚有重屯糧乏例糴他境興商搜括滲  
漏以補之食遂足民舊皆茅舍易焚興商貸錢易瓦火  
患乃息又奏免其償修學宮立義塚定部轄民兵升差  
法郡以大治楚州議改築城有謂韓世忠遺基不可易  
者命興商往視既至闕地丈餘增築之紹熙

按紹熙原作紹興據



上文敘乾道以後事則與元年遷保靜軍承宣使召領字顯係熙字之誤今改

內祠充明堂大禮都大主管大內公事寧宗即位除知明州兼沿海制置使告老授武泰軍節度使卒贈太尉謚忠肅興裔歷事四朝以材名結主知中興外族之賢未有其比子三人挺以橫行團練使歷淮襄兩道帥捐登進士甲科與抗皆有位于朝

楊次山字仲甫恭聖仁烈皇后兄也

按宋史仁烈皇后傳忘其姓氏或云

會稽人有楊次山者后自謂其兄也

其先開封人曾祖全以材武奮靖康



未捍京城死事祖漸以遺澤補官仕東南家於上虞次山儀狀魁偉少好學能文補右學生后受職官中次山遂霑恩得官累至武德郎帶御器械知閤門事除吉州刺史提舉佑神觀后受冊除福州觀察使岳陽軍節度使后謁家廟加太尉韓侂胄誅加開府儀同三司尋進少保封永陽郡王南郊恩加少傅充萬壽觀使致仕加太保授安德昭慶軍節度使改封會稽郡王次山能避權勢不預國事時論賢之嘉定十二年卒贈太師追封



冀王子二人谷至太傅保寧軍節度使充萬壽觀使新

安郡王

宋史本傳作永寧郡王按石已封永寧郡王不應兄弟同爵當以仁烈皇后傳谷封新安郡王

為是今據改

石字介之乾道間入武學慶元中補承信郎差

充閣門祗候帶御器械嘉泰四年充賀正旦接伴使時

金使驕倨自矜善射石挽弦三發三中金使氣沮嘉定

改元除揚州觀察使知閣門事進保寧軍節度使提舉萬

壽觀奉朝請進封信安郡侯十五年以檢校少保進封

開國公寧宗崩宰相史彌遠謀廢立命石與谷白后理



宗立授開府儀同三司充萬壽觀使時寶慶垂簾石乃  
密疏章獻慈聖宣仁所以臨朝之由遠及漢唐母后臨  
朝稱制得失上之后覽奏即命擇日撤簾進石少保封  
永寧郡王以三上太后冊寶進至太傅石性恬澹每拜  
爵命必力辭恭聖祔廟除太師兄谷疑於辭受石曰吾  
家非有元勛盛德徒以恭聖故致貴顯若儼然受之是  
自速顛覆耳矧恭聖抑遠族屬意慮深遠言猶在耳何  
可遽忘乃合疏懇辭至再三不受及屬疾除彰德集慶



節度使進封魏郡王卒贈太師





欽定續通志卷五百四



欽定四庫全書

史部

欽定續通志卷五百五  
七至

編修<sub>臣</sub>謝振定覆勘

總校官原任侍講<sub>臣</sub>王燕緒



欽定四庫全書

欽定續通志卷五百五

外戚傳

遼

臣等謹按遼史外戚有表而散見於列傳以蕭氏  
勢均耶律不勝載也今取皇后親父兄弟及尚帝  
女者彙為一卷

蕭達魯

阿古齊

蕭哈里

蕭遜

蕭繼先



蕭巴雅爾

恒德

蕭孝穆

孝忠  
阿拉

孝友  
薩巴

蕭托雲

蕭托卜嘉

蕭惠

慈實努

蕭奉先

蕭達魯字達年本契丹大族賜姓其母為德祖女弟而  
淳欽皇后又其女兄也五世祖曰哈瑪爾約尼氏時嘗  
使唐唐留之幽州一夕拆關遁歸國由是世為決獄官  
達魯性寬厚膂力絕人習軍旅事太祖潛藩日侍左右  
凡征討必與行陣既即位達魯與弟阿古齊皆總宿衛  
拜達魯北府宰相世其官太祖征奚及討劉守光達魯



畧地海濱殺獲甚衆埒克等亂潰而北走達魯率輕騎追之兼晝夜行至榆河敗其黨獲埒克以獻太祖嘉之錫賚甚渥後討西南夷功居諸將先神冊三年卒達魯有膽畧聞敵所在即馳赴親冒矢石前後戰未嘗少衄必勝乃止以故在太祖功臣列喻以手云弟阿古齊

阿古齊字薩巴少性卓越自放不羈及長以驍勇稱善騎射臨陣敢前每射中敵甲楯輒洞貫太祖為裕悅時以材勇充任使既即位與達魯總腹心部埒克之亂也



淳欽皇后軍黑山阻險自固太祖方經畧奚地命阿古  
齊統百騎往衛之逆黨特爾特耶律華格素憚其勇畧  
相戒不敢犯埒克既北走與達魯追擒於榆河神冊初  
元討西南夷有功徇山西諸郡縣又下之敗周德威軍  
三年以功拜北府宰相世其職天贊初與王郁畧地燕  
趙破磁窯鎮太祖西征悉委以南面邊事攻渤海破扶  
餘城獨將騎兵五百敗老相軍三萬渤海既平改東丹  
國已降郡縣復叛盜賊蜂起阿古齊與康默記討之所



向披靡會賊游騎七千自鴨綠府來援勢張甚阿古齊  
帥麾下精銳直犯其鋒一戰克之斬馘二千餘遂進軍  
破輝發城以病卒功臣中喻阿古齊為耳云子安圖官  
至右皮室詳袞世宗懷節皇后其女也

據后妃  
傳增輯

蕭哈里字伊德森其先在約尼氏時為本部額爾奇木  
父塔喇歸附後仍襲其職天顯間為本部令公哈里貌  
魁偉膂力過人以材武襲父職天祿間娶明王安圖女  
阿雅翁主應歷初察克亂連雅連坐繼娶綽果公主

按綽



果太宗第二女史稱翁  
主誤今據公主表改

帝以近戚嘉其勤篤命世預北

府宰相選

世字據穆  
宗紀增

頃之總知軍國事時諸王多坐反

逆哈里為人廉謹達政體每被命案獄多得其情人無  
冤者繇是知名漢主劉承鈞每遣人入貢必別致幣物  
詔許受之卒

蕭遜小字伊庫宰相達魯族弟呼瑪喇之子為人少通  
書史而多文飾太宗時為奚圖魯太尉尚燕國公主為  
羣牧都林牙遜在軍中握齬修邊幅僚佐皆言非將帥



才尋為南京留守初周人攻揚州帝遣遜躡其後憚暑不敢進拔緣邊數城而還後周師來侵圍馮母鎮遜請益兵帝報曰敵來則與統軍司併兵拒之敵去則務農作勿勞士馬會敵入東城

按東城史傳誤作東城據五代史及穆宗本紀改

我

軍退渡滹沱而屯遜勒兵徐行周軍數日不動遜與諸將議曰敵衆而銳戰不利則有後患不如頓兵以老其師躡而擊之可以必勝諸將從之遂與統軍司兵會師他說請濟師周人引退遜亦還已而周復北侵與其將



傳元卿李崇進

通鑑作李重進

等分道並進圍瀛州陷益津瓦

橋淤口三關垂迫固安遜不知計所出但云車駕旦夕至麾下士奮躍請戰不從已而陷易瀛莫等州京齊人皆震駭遁入西山遜以邊防失利恐朝廷罪已表請親征會周主病歸遜退至益津僞言不知所在遇步卒二千餘人來拒敗之是年聞周喪燕民始安乃班師時穆宗酒酒嗜殺遜以密戚預政無所匡輔士論不與應歷十九年春蒐帝射熊而中遜與伊勒希巴伊勒希等進



酒上壽帝醉還宮夜為庖人錫衮所弑遜與南院樞密使高勲飛龍使尼哩等立景宗保寧初為北院樞密使兼北府宰相仍命世預其選帝冊遜女為后加尚書令封魏王從帝獵閭山為賊所害

蕭繼先字楊隱小字瑠智格幼穎悟叔遜命為子睿智皇后尤愛之乾亨初尚齊國公主拜駙馬都尉統和四年宋人來侵繼先率邏騎逆境上多所俘獲帝嘉之拜北府宰相自是出師繼先必將本府兵先從拔狼山石



壘破宋軍應州帝南征取通利軍戰稱捷力及親征高麗以年老留守上京卒繼先雖處富貴尚儉素所至以善治稱故將兵攻戰未嘗失利名重戚里

蕭巴雅爾字韓隱國舅少父房之後為人多智畧嫻於騎射統和初為左皮室詳袞討準布有功四年破宋將曹彬米信兵於望都凡軍事有疑每預參決尋總永興宮分紂及錫里伊喇二皮室等軍與樞密使耶律色珍收復山西所陷城邑攻宋圍蒲城率所部先登拔之改



南京統軍使尚衛國公主拜駙馬都尉加同政事門下  
平章事十三年歷北南院宣徽使條上時政得失及賦  
役法帝嘉納焉十五年加政事令遷東京留守二十二  
年復攻宋下德清軍蕭達林卒專任南面事宋和議成  
為北府宰相聖宗征高麗王兵由北道進至開京西嶺  
破敵軍斬數千級高麗王詢奔平州巴雅爾入開京大  
掠而還封蘭陵郡王開泰二年以宰相知西南面招討  
使五年進王東平為政寬裕而善斷諸部畏愛民以殷



富七年再伐高麗至開京俘掠而還渡茶陀二河敵夾射巴雅爾委甲仗走坐是免官太平三年為西南面招

討

據聖宗紀增

復王幽薨弟恒德

恒德字遜寧有膽略而善謀統和元年尚越國公主拜駙馬都尉遷南面林牙從宣徽使耶律阿穆爾征高麗還改北面林牙會宋將曹彬米信侵燕耶律休格與恒德議軍事多見信用為東京留守六年帝攻宋圍沙堆恒德獨當一面城上矢石如雨恒德意氣自若督將士



奪其裨城陷中流矢太后親臨視攻長城口復先登太  
后益多其功時高麗未附恒德受詔率兵拔其邊城王  
懼上表請降十二年賜啓聖竭力功臣從都部署和碩  
鼎討烏舍未戰烏舍請降恒德不許烏舍死戰城不能  
拔和碩鼎議欲引退恒德曰以彼倔強吾奉詔來討無  
功而還諸部謂我何若深入多獲猶勝徒返遂進擊東  
南諸部至高麗北鄙比還道遠糧絕士馬死傷甚衆坐  
是削功臣號十四年為行軍都部署伐博囉滿達部還



公主疾太后遣宮人賢釋侍之恒德私焉公主恚而薨  
太后怒賜死後追封蘭陵郡王子必塔別有傳

蕭孝穆小字和多沁太祖淳欽皇后次弟阿古齊之五  
世孫父托輝為國舅詳袞孝穆廉謹有禮法統和二十  
八年累遷西北路招討都監開泰元年遙授建雄軍節  
度使加檢校太保是年珠拉等變孝穆擊走之進軍哈  
屯城準布結五羣牧長扎拉圖等謀中外相應孝穆悉  
誅之迺嚴備禦以待餘黨遂潰以功遷九水諸部安撫



使尋拜北府宰相賜忠穆熙霸功臣檢校太師同政事  
門下平章事八年還京師太平二年知樞密院事充漢  
人行宮都部署三年封燕王南京留守兵馬都總管九  
年大延琳以東京叛孝穆為都統討之戰于蒲水中軍  
稍却副部署蕭必塔都監蕭博諾以兩翼夾擊賊潰追  
敗之於手山北延琳走入城深溝自衛孝穆圍之築重  
城起樓櫓使內外不相通城中撤屋以繫其將楊詳世  
等擒延琳以降遼東悉平改東京留守賜佐國功臣為



政務寬簡撫納流徙其民安之興宗即位徙王秦尋復  
為南京留守重熙六年進封吳國王拜北院樞密使八  
年表請籍天下戶口以均徭役又陳諸部及錫里軍利  
害從之政賦稍平衆悅九年徙王楚時天下無事戶口  
蕃息帝富於春秋每言及周取十縣慨然有南伐之志  
羣臣多順旨孝穆諫曰昔太祖南伐終以無功嗣聖皇  
帝仆唐立晉後以重貴叛長驅入汴鑾馭始旋反來侵  
軼自後連兵二十餘年僅得和好蒸民樂業南北相通



今國家比之曩日雖曰富強然勲臣宿將往往物故且

宋人無罪陛下不宜棄先帝盟約書奏不報以老乞骸

骨不許十一年

本紀作十二年

復為北院樞密使更王齊薨追

贈大丞相晉國王謚曰貞孝穆欽哀皇后之兄仁懿皇

后之父也

據后妃傳增輯

雖椒房親位高益畏太后有賜輒辭

不受妻子無驕色所薦拔皆忠直士嘗語人曰樞密選

賢而用何事不濟若自親煩碎則大事凝滯矣自蕭和

卓以吏才進其後轉效不知大體歎曰不能移風易俗



偷安爵位臣子之道若是乎時稱為國寶臣二子阿拉

薩巴弟孝先孝忠孝友

按此下原有蕭孝先傳今因其與謀弑仁德皇后又與欽哀后

謀廢立改

入逆臣

孝忠字薩巴小字特固斯幼立志慷慨及長以戚屬入侍開泰中補祗候郎君尚越國公主拜駙馬都尉累遷殿前都點檢太平中擢北府宰相重熙七年為東京留守時禁渤海人擊毬孝忠言東京最為重鎮無從禽之地若非毬馬何以習武且天子以四海為家何分彼此



宜弛其禁從之十二年入朝封楚王拜北院樞密使國  
制以契丹漢人分北南院樞密治之孝忠奏曰一國二  
樞密風俗所以不同若併為一天下幸甚事未及行薨  
追封楚國王赦死囚數人為孝忠薦福賜宮戶守塚子  
阿蘓終南院樞密使

孝友字塔布布延小字辰瑠幼以小字稱開泰初緣戚  
屬為小將軍太平元年以大冊加左武衛大將軍檢校  
太保賜名孝友重熙元年累遷西北路招討使封蘭陵



郡王八年進王陳先是蕭惠為招討使專以威制西羌諸夷多叛孝友厚加綏撫每入貢輒增其賜物羌人以安久之寢成姑息桀驁之風遂熾議者譏其過中十年加政事令以葬兄還京師拜南院樞密使進王趙拜中書令丁母憂起復北府宰相出知東京留守會伐夏孝友失利河南帝欲誅之太后救免復為東京留守徙王燕改上京留守更王秦清寧初加尚父頃之復留守東京明年復為北府宰相以柴冊恩遙授洛京留守致仕



進封豐國王坐子呼敦與重元亂伏誅

阿拉字額哩埒以仁懿皇后之同母弟幼養宮中興宗  
尤愛之重熙六年為弘義宮使累遷同知北院樞密使  
加同中書門下平章事出為東京留守二十一年拜西  
北路招討使封西北郡王尚秦晉國王公主拜駙馬都  
尉清寧元年拜北府宰相兼南院樞密使進王韓明年  
改北院樞密使徙王陳與蕭格同掌國政格諂諛不法  
阿拉爭之不得告歸帝由此惡之除東京留守會行色



克色哩禮入朝陳時政得失格以事中傷帝怒縊殺之  
皇太后營救不及大慟曰阿拉何罪而遽見殺帝乃優  
加賻贈阿拉性忠果曉世務有經濟才議者以謂阿拉  
若在無重元伊蘇之亂子額哩頁列姦臣傳

薩巴字周隱七歲即以仁懿后弟推恩加左右千牛衛

大將軍

按聖宗紀太平四年以蕭孝穆子順為千牛衛將軍百官志同考孝穆子無蕭順名而此傳授

官正與紀合或薩巴又名順也

重熙初補祗候郎君性廉介風姿爽朗

善毬馬馳射帝每燕飲喜諧謔薩巴雖承寵顧常以禮



自持以柴冊恩加檢校太傅永興宮使總領左右護衛  
同知點檢司事尚魏國公主拜駙馬都尉為北院宣徽  
使仍總知朝廷禮儀重熙末出為西北路招討使武寧

郡王居官以治稱與公主不諧離婚據公主表增清寧初卒

追封齊王

按薩巴與公主離婚不應入外戚因係興宗  
仁懿后弟附列於此與蕭酬幹之因離婚而

入列傳  
者不同

蕭托雲字烏延北府宰相哈里之子統和初皇太后稱  
制以戚屬推恩入侍尋出為烏爾古部都監命討實穆



噶等部有功遷烏爾古部節度使十九年總領西北路  
軍事後以本路兵伐甘州降其酋長伊噶勒既而伊囉  
勒復叛仍命討之克肅州盡遷其民於托輝口故城師  
還尚金鄉公主拜駙馬都尉加同政事令門下平章事  
上言曰準布今已服化宜各分部治以節度使帝從之  
自後節度使往往非材部民怨而思叛開泰元年錫里  
太師阿勒達其節度使西奔鄂爾多城蓋古所謂龍庭  
單于城也準布復叛圍托雲於哈屯城托雲使諸軍射



却之屯于鄂爾多城明年北院樞密使耶律華格引兵來救托雲遣人誘諸部降帝以托雲始雖失計後得人  
心釋之仍領諸部請益軍詔讓之曰叛者既服兵安用  
益且前日之役死傷甚衆若從汝謀邊事何時而息遂  
止會公主坐殺家婢降封郡主托雲罷使相尋起為烏  
爾古德噶勒部詳袞以老代還卒子雙寬南京統軍使  
孫烏都溫尚三韓郡王赫魯之女固頁公主終烏爾古  
德噶勒部統軍使以善戰名於世



蕭托卜嘉字烏拉丹國舅郡王果濟之孫性剛直咸雍中補祇候郎君太康元年為彰愍宮使尚趙國公主拜駙馬都尉三年改同知漢人行宮都部署與北院宣徽使耶律托卜嘉善伊遜嫉之令人誣告謀廢立事不勝撈掠誣伏帝引問昏瞶不能自陳遂見殺乾統間追封蘭陵郡王繪像宜福殿

蕭惠字伯仁小字托古斯太祖淳欽皇后次弟阿古齊之五世孫道宗宣懿皇后父也以中宮親為國舅詳袞



從伯父巴雅爾征高麗至努克特北嶺力戰破之及攻  
開京以軍律整肅聞授契丹行宮都部署開泰二年改  
南京統軍使未幾為右伊勒希巴加同中書門下平章  
事朝議以遼東重地非勲戚不能鎮撫乃命惠知東京  
留守事改西北路招討使封魏國公太平六年討回鶻  
阿爾斯薩蘭部徵兵諸路獨準布酋長濟喇後期斬以  
徇按聖宗紀是年三月準布來侵蕭惠破之在進圍甘  
州之前此謂以後期斬其酋長蓋當時或戰勝而後  
伏誅也進圍甘州不克而還濟喇之子聚兵來襲準布酋



長烏巴密以告惠未之信會西準布叛襲三克軍都監  
尼嚕古托濟部節度使轄哩額布勒等將兵來救遇敵  
於哈屯城西南轄哩額布勒戰歿士卒潰散惠倉卒列  
陣敵出不意來攻衆請乘時奮擊惠以軍疲未可用弗  
聽烏巴請以夜斫營惠又不許準布歸惠乃設伏兵擊  
之前鋒始交敵敗走惠為招討累年屢遭侵掠士馬疲  
困七年左遷南京侍衛親軍馬步軍都指揮使復討準  
布

據聖宗  
紀增

尋遷南京統軍使興宗即位知興中府歷順



義軍節度使東京留守西南招討使使加開府儀同三司檢校太師兼侍中封鄭王重熙六年復為契丹行宮都部署加守太師徙王趙拜南院樞密使更王齊是時帝欲一天下謀取三關集羣臣議惠曰兩國彊弱聖慮所悉宋人西征有年師老民疲陛下親率六軍臨之其勝必矣蕭孝穆諫弗聽迺遣使索宋十城宋人增歲幣請和惠以首事功進王韓十二年兼北府宰相同知元帥府事又為北樞密使十三年帝親征夏國元昊請降



惠曰元昊忘奕世恩萌姦計車駕親臨不盡歸所掠天  
誘其衷使彼來迎天與不圖後悔何及帝從之詰旦進  
軍夏人列拒馬於河西蔽盾以立惠擊敗之元昊走惠  
麾先鋒及右翼邀之大風忽起飛沙眯目軍亂夏人乘  
之蹂踐死者不可勝計詔班師十七年尚帝姊秦晉國  
長公主拜駙馬都尉明年帝復征夏國惠自河南進戰  
艦糧船綿亘數百里既入敵境鎧甲載於車軍士不得  
乘馬諸將請備不虞惠曰諒祚必自迎車駕何暇及我



數日軍未營候者報夏師至惠方詰妄言罪諒祚軍從  
阪而下惠與麾下不及甲而走追者射惠幾不免軍士  
死傷尤衆師還以惠子慈實努別戰涼州歿於陣詔釋  
其罪十九年請老詔賜肩輿入朝策杖上殿辭章再上  
乃許之封魏國王詔冬夏赴行在參決疑議既歸賜賚  
不絕清寧二年薨遺命家人薄葬惠性寬厚自奉儉薄  
興宗使惠恣取珍物惠曰臣以戚屬據要地祿足養廉  
奴婢千餘不為闕乏陛下猶有所賜貧於臣者何以待



之帝以為然故為將雖數敗屢不罪也弟實喇武定軍節度使封鄭王惠有二子曰慈實努曰額固尼額固尼終北府宰相慈實努字寧隱太平初以戚屬補祗候郎君帝愛其勤慎升札薩克轄加右監門衛上將軍西邊有警授西北路招討都監領保大軍節度使政濟恩威諸部悅服入為殿前副點檢歷烏爾古德呼勒部詳衮征李諒祚為統軍都監與西北路招討使達魯噶率番部諸軍由北路趨涼州獲諒祚親屬夏人扼險以拒中



流矢卒贈中書門下平章事

按此下應列蕭常格傳係天祚德妃之兄仕至北府

宰相以無事  
蹟足錄從刪

蕭奉先天祚元妃之兄也外寬內忌因元妃為帝眷倚累官樞密使封蘭陵郡王天慶二年帝幸混同江釣魚故事生女真酋長在千里內者皆朝行在適頭魚宴帝使諸酋次第歌舞為樂至阿古達端立直視辭以不能再三諭不從帝密謂奉先曰阿古達跋扈若此可託以邊事誅之奉先曰彼麤人不知禮義且無大過殺之傷



向化心設有異志叢爾小國亦何能為帝乃止四年阿古達起兵逼寧江州蕭托卜嘉戰失利帝命奉先弟嗣先為都統將番漢兵往討嗣先敗績于混同江奉先懼弟被誅乃奏東征潰軍逃罪所至劫掠若不肆赦將嘯聚為患從之嗣先詣闕待罪止免官而已由是士無鬪志遇敵輒潰郡縣所失日多初奉先誣耶律伊都結駙馬蕭昱謀立其甥晉王殺昱伊都奔女真保大二年伊都為女真監軍引兵奄至帝憂甚奉先曰伊都實無亡



遼心欲殺晉王耳若以社稷計不惜一子誅之可不戰而退遂賜晉王死中外莫不流涕人心益解體當女真之兵未至也奉先逢迎天祚言女真雖能攻上京終不能遠離巢穴及擣雲中計無所出惟請播遷夾山天祚方悟顧謂左先曰汝父子誤我至此殺之何益汝去母從我行恐軍心忿怒禍必及我奉先父子慟哭而去為左右執送女真兵女真兵斬其長子昂送奉先及次子昱於其國主道遇遼兵奪歸天祚並賜死



欽定續通志卷五百五



欽定四庫全書

欽定續通志卷五百六

外戚傳

金

實嘉努

費摩達

圖克坦恭

唐古德溫

李石

赫舍哩志寧

布薩忠義

撰

烏凌阿暉

富察鼎壽

圖克坦思忠

烏庫哩元忠

唐古貢



圖克坦公弼

圖克坦銘

圖克坦肆喜

實嘉努富察部人祖和爾坦世祖外孫和諾克薩克達之亂昭肅皇后父母兄弟皆在敵境和爾坦以計迎還之實嘉努自幼撫養於太祖家及長以女妻之年十五從攻寧江州敗遼主親軍攻臨潢皆有功襲穆昆後自山西護齊國王摩囉歡之喪歸上京道由興中時方攻興中未下乃置樞於驛率所領明安兵助王師破其城從宗望討張覺再從宗翰伐宋宗翰聞宗望軍已圍汴



遣往計事抵平定軍遇敵數萬敗之遂見宗望還報宗  
翰甚嘉之羅索討陝西未下領所部援之既而屯戍西  
京會契丹達實出奔為伊都副元帥襲諸部族以還未  
幾有疾退居鄉里天眷間授侍中駙馬都尉再以都統  
定邊部封蘭陵郡王除東京留守以病致事卒加贈鄖  
王正隆例奪封魯國公

費摩達本名呼達博勒和部人熙宗悼平皇后父淳直  
孝友天輔六年從普嘉努追叛寇於鐵呂川力戰有功



天眷二年授世襲明安以后貴拜太尉封徐國公皇統九年悼后死尋海陵弑熙宗欲邀衆譽以悼后死非罪於是封呼達為王天德三年卒子呼敦為燕京留守以罪免居中都命馳驛赴之及葬使秘書監納哈塔椿年致祭

按此下原有呼敦傳只記其貪汚事今已刪附圖克坦恭傳中

圖克坦恭本名舍音海陵后父天眷二年為奉國上將軍以告烏舍反事超授龍虎衛上將軍為戶部侍郎歷濟南尹會寧牧封譚國公復出為太原尹與熙宗后兄



費摩呼敦皆貪汙不法呼敦為行軍明安厯橫海崇義  
軍節度使拜富人為父死為行服以分其資選諸明安  
饒裕子弟為章京規取財物時號間即君恭亦自稱嘗  
見佛使工繪一佛像賦屬縣金鑄佛卒不鑄盡入其家  
百姓號為金總管朝廷命秉德廉訪官吏二人皆被黜  
自此定禁外官任所間雜人條約海陵立復用為會寧  
牧封王未幾拜平章政事海陵謂宰相曰恭為相朕非  
私之今聞軍國大事凡有恭所言卿等何一無取豈千



慮無一得乎溫敦思忠舉數事對曰某事本當如此恭  
輒以爲如彼皆妄生異議不達事宜累朝宰相未有如  
此專恣者海陵默然恭兄定格尚太祖長女烏嚕死無  
子以季弟子扎拉爲後恭謀取其家財強納烏嚕爲室  
而不相能恭妾呼達得幸於圖克坦后與嚕不協乃潛  
譖於海陵言烏嚕怨帝殺其兄宗敏有怨望語會韓王  
亨改廣寧尹諸公主宗婦往賀其母烏嚕以言慰亨母  
呼達亦以爲指斥海陵使蕭裕鞠之左驗皆不敢言遂



殺烏嚕恭因奪扎拉家財以烏嚕有怨望語恭不奏免  
官俄復為司徒拜太保再進太師封梁晉國王貞元二  
年九月從獵順州卒賜諡曰忠正隆間改封齊國公大  
定間降特進鞏國公所奪家財皆追正之

按此下原有烏庫哩富勒

呼傳無事實  
足錄今刪

唐古德溫本名阿里上京率河人曾祖實庫從太祖平  
拉必瑪察領穆昆祖特伯烈從伐遼攻寧江泰州有功  
父達蘭尚康宗女從宗望收平州遇敵兵甚眾戰敗之



授行軍明安厯興平臨海等軍節度使卒德溫善射尚  
睿宗女楚國長公主天眷三年授宣武將軍皇統元年  
從宗弼南征善突戰遷廣威將軍累遷定遠大將軍兵  
部尚書出為橫海軍節度使延安尹兼鄜延路兵馬都  
總管世宗即位封道國公為殿前都點檢駙馬都尉大  
定二年以父祖功授安春明安所管世襲穆昆三年世  
宗出獵拜天子北郊語以扈從軍士二千飲食芻秣恐  
擾百姓使嚴為約束分給錢一萬貫四年進太子太傅



卒十八年追錄前後功授其長子駙馬都尉鼎世襲西

北路摩哩山明安

按此下原有烏庫哩尼瑪哈傳其祖和勒端常追遼主却夏兵尼瑪哈尚

睿宗女冀國長公主仕終廣寧尹嗜酒廢政無事蹟足錄人有富察阿古岱傳累尚海陵姊遼國鄭國長公主

亦無事蹟

今並刪

李石字子堅遼陽人先世仕遼為宰相高祖仙壽嘗脫

遼主之舅於難賜遼陽及湯池地千頃父綽爾齊為遼

桂州觀察使其女以士族選入睿宗邸生世宗是為貞

懿皇后石敦厚寡言器識過人天會二年授世襲穆昆



為行軍明安睿宗為右副元帥引置軍中屬之宗弼八

年除禮賓副使轉洛苑副使十五年

按照宗本紀及續通鑑綱目皆作天

會十五年廢劉豫置行臺尚書省於汴史傳誤作天眷元年今據改

置行臺省於汴石為

汴京都巡檢使累官景州刺史海陵營建燕京宮室石

護役皇城端門及遷都入見海陵指石曰此非葛王之

舅乎葛王謂世宗也未幾除興中少尹石知海陵忌宗

室秩滿託疾還鄉里世宗留守東京海陵使副留守高

存福伺察之知軍李富色克知存福謀以告世宗石時



留東京因勸世宗先除存福然後舉事世宗從之大定  
元年以定策功為戶部尚書拜參知政事阿蘇殺同知  
中都留守富察薩勒扎遣使奉表東京而羣臣多勸世  
宗幸上京者石奏曰正隆遠在江淮寇盜竊起萬姓引  
領東向宜因此時直趨中都據腹心以號今天下惟陛  
下無牽於衆惑帝意遂決即日啓行初世宗納石女後  
宮至是封賢妃後進封元妃三年戶部尚書梁球按梁  
球字

國寶見元好問  
史傳誤作錄今改正

中州集

上言大定以前官吏士卒俸粟



支帖真偽相雜請一切停罷石買革去舊帖下倉支粟  
倉司不敢違與以新粟事聞帝以問梁球梁球對不以  
實命尚書左丞翟永固鞠之梁球削官四階石罷為御  
史大夫久之封道國公六年帝幸西京石與少詹事烏  
庫哩薩哈守衛中都宮闕詔曰京師巡禦不可不嚴近  
都明安內選士二千人巡警仍給口泰芻粟七年拜司  
徒兼太子太師安化軍節度使圖克坦子溫賊濫不法  
石劾奏之一日帝謂石曰御史分別庶官邪正卿等惟



刻有罪而未嘗舉善也宜令監察分路刺舉善惡以聞  
石司憲既久年寢高御史臺奏事有在制前斷定乞依  
新條改斷者帝謂曰卿年老矣不能久居此若能舉一

二善士亦不負此職也十年

按世宗本紀十年正月甲戌以司徒御史大夫李石

為太尉尚書令此處誤作九年今據改

進拜太尉尚書令進封平原郡王

以太保致仕徙王廣平十六年卒謚襄簡石以勲戚久  
處腹心之寄內廷獻替外罕得聞山東河南軍民交惡  
爭田不絕有司謂兵為國根本姑宜假借石持不可曰



兵民一也孰輕孰重國家所恃以立者紀綱耳紀綱不明故下敢輕冒惟當明其疆理示以法禁使之無爭是為長久之術趣有司拯問自是軍民息爭北鄙歲警朝廷欲發民穿塹以禦之石與丞相良弼皆曰北俗無定居出沒不常惟當以德柔之若徒深塹必當置戍塞北多風沙曾未期年塹已平矣不可疲中國有用之力為此無益議遂寢世宗在位幾三十年尚書令凡四人張浩以舊官完顏守道以功圖克坦克寧以顧命石以定



策他無及者明昌五年配享世宗廟庭子獻可達可

按李

石為貞懿后弟金史舊係列傳今移入外戚其子獻可附傳以無事蹟從刪

赫舍哩志寧本名薩哈連上京和坦人自五世祖太尉罕齊以來與國世為甥舅父薩巴海陵時賜名懷忠為泰州路顏河世襲穆昆轉明安累官開遠軍節度使志寧沈毅有大略娶梁王宗弼女永安縣主皇統間為護衛海陵以為右宣徽使累遷樞密副使開封尹契丹薩巴反以志寧為西北面副統與都統白彥敬以北京臨



潢泰州三路軍討之志寧至北京聞世宗有異志陰結  
會寧尹完顏富色里利涉軍節度使通古義等將圖世  
宗而世宗已即位使完顏默音來伐衆不肯戰乃與彥  
敬俱降世宗使默音征幹罕志寧以臨海節度使都統  
右翼軍幹罕兵敗西走志寧追及於霧霖河賊已先渡  
毀橋梁依岸為陣志寧夾河為疑兵與萬戶瓜爾佳清  
臣圖克坦和羅從下流暗渡士卒畢濟方食賊奄至志  
寧力戰流矢中左臂戰自若賊據上風縱火乘烟勢馳



擊會雨作火乃熄遂奮擊大破之於是元帥默音右監  
軍福壽不急擊賊久無功右丞布薩忠義請自討賊而  
志寧擊賊有功帝以忠義代默音志寧代福壽封定國

公使富察通至軍中宣諭之賊略懿州界陷靈山同昌

惠和

按金史地理志北京路有惠和縣本傳訛為慶和今改

三縣睥睨北京會土

河水漲賊不得渡乃西趨三韓縣志寧方追躡之元帥  
忠義與賊遇於花道軍頗失利賊見志寧踵其後遂西  
走是時諸將欲止軍勿追志寧獲賊候人知賊自選精



銳與老小輜重分道期山後會集可擊其輜重忠義以  
為然遂過伊瑪嶺進及梟嶺西陷泉賊見左翼據南岡  
為陣不敢犯右翼萬戶烏雅扎拉擊賊少却志寧與瓜  
爾佳清臣等擊之賊大敗涉水走幹罕母蘇尼舉營由  
羅和岡西去追及之盡獲其輜重俘五萬餘人

布薩忠義傳作

作生口三十萬

雜畜不可勝計部族皆降幹罕走奚中至七渡

河復敗之賊過渾嶺入奚中志寧獲賊將碩和卓許以  
官賞縱之歸約以捕幹罕自効碩和卓既去見幹罕秘



不言見獲事乃反間奚人於幹罕曰陷泉失利奚人有  
貳志不可不察時幹罕屢敗其下異心碩和卓乃與賊  
帥錫勒塔執幹罕詣右都監完顏思敬降志寧等追捕  
餘黨賊悉平入朝為左副元帥經略宋事大定二年志  
寧駐軍睢陽使完顏旺祥復取蔡州完顏襄拔賴州移  
牒宋樞密使張浚使依皇統以來舊式時宋得幹罕黨  
人爪里扎巴用其謀攻靈壁虹縣都統奚托卜嘉叛入  
宋三年爪里等謀曰北人恃騎射今夏月以雨膠解弓



不可用故李世輔與之來攻宿州歸德尹珠嘉蘇色宿州防禦使烏凌阿薩喇萬戶溫特赫蘇赫費摩羅索不俟大軍輒出戰由是軍敗城陷世輔得志日與爪里扎巴置酒高會志寧以精兵萬人自睢陽趨宿州世輔聞志寧軍少易之五月志寧將至宿州令從軍盡執旗幟馳州西為疑兵三明安兵駐州南志寧自以大軍駐州東南扼其歸路世輔先擊東南軍以步騎數萬皆執盾背城為陣外捍以行馬使別將將兵三千出東門欲自



陣後攻志寧軍萬戶芬徹擊敗之右翼萬戶瓜爾佳清  
臣為前行撤毀行馬短兵接戰世輔軍亂諸將乘勢追  
殺至城下是夕世輔盡按敗將將斬之其統制常吉懼  
而來奔盡得城中虛實明日世輔悉兵出戰騎兵居前  
志寧麾諸軍力戰世輔復大敗走者自相蹈藉爭城門  
而入門填塞緣城而上金軍自濠外射之皆墮死墮間  
殺騎士萬五千步卒三萬餘人世輔乘夜脫走明日瓜  
爾佳清臣張師忠追及世輔斬首四千餘赴水死者不



可勝計獲甲三萬他兵仗甚衆帝以御服金線袍玉吐  
鶻賓鐵佩刀使伊喇道就軍中賜之凡有功將士明安  
穆昆並遷賞詔志寧曰卿雖年少前征契丹戰功居最  
今復破大敵朕甚嘉之宋人復議和志寧還軍睢陽帝  
以御服玉佩刀通犀御帶賜之五年志寧駐軍南京五  
月召至京師拜平章政事左副元帥如故復還軍六年  
二月還京師拜樞密使七年以第十四女下嫁志寧子  
諸神努九年拜右丞相十一年代宗敘北征既還入見



封廣平郡王封金源郡王十二年卒謚武定十五年圖  
像衍慶宮帝嘗語宰臣曰志寧臨敵身先士卒勇敢之  
氣自太師梁王未有如此人者也明昌五年配享世宗

廟庭

按赫舍哩志寧及布薩忠義皆世為國戚金史舊係列傳今並移入外戚

布薩忠義本名烏哲上京博勒和河人宣獻皇后姪元  
妃之兄也高祖幹喇布曾祖瑣都祖呼蘭父博囉國初  
世襲穆昆博索路統軍使忠義魁偉長髯喜談兵有大  
略年十六領本穆昆兵從睿宗定陝西射中宋大將宋



兵遂潰由是知名帥府承制署為穆昆宗弼再取河南  
薦為明安攻冀州先登攻大名府以本部兵力戰破其  
軍十餘萬從宗弼渡淮攻壽慮等州領親軍萬戶趙寧  
遠大將軍承其父世襲穆昆皇統四年除博州防禦使  
公餘學女真字及古算法閱月盡能通之在郡不事田  
獵燕游郡中翕然稱治及考郡民詣闕願留詔從之累  
遷西北路招討使入為兵部尚書布薩呼圖嘗與海陵  
築立恃勢陵傲同列忠義因會飲衆辱之海陵不悅出



為震武軍節度使火山賊李鐵槍乘暑來攻忠義從一  
騎迎擊之射殺數人賊乃退改臨洮尹兼熙秦路兵馬  
都總管閱再考徙平陽尹再徙濟南尹以本官為曠南  
路行營副統制伐宋克通化軍世宗立入朝拜尚書右  
丞伊喇幹罕僭號兵久不決忠義請曰契丹小寇不時  
殄滅致煩聖慮臣願効死力除之世宗大悅拜平章政  
事兼右副元帥封榮國公詔曰軍中將士有犯連職之  
外並以軍法從事有功者依格遷賞並詔諸將士同心



戮力無或弛慢忠義至軍賊陷靈山同昌惠和等縣結陣西行忠義追之及于花道宗亨為左翼宗敍為右翼與賊夾河陣賊渡河先攻左翼偏敗右翼救之賊引去幹罕乃以精銳自隨以羸兵護其母妻輜重由別道西走期於山後會集忠義追及於諾爾嶺西臨泉時昏霧四塞跬步莫覩物色忠義禱奠已昏霧廓然及戰忠義左據南岡為偃月陣右迤而北大敗之獲其弟諾爾俘生口三十萬獲雜畜十餘萬車帳金珍以鉅萬計悉分



諸軍賊走趨奚地遣將追躡至七渡河又敗之既踰渾  
嶺復進軍襲之降者相屬於路幹罕就執契丹平朝京  
師拜尚書右丞相改封沂國公時宋孝宗立雖嘗遣使  
來而欲用敵國禮又用扎巴計攻取泗壽等州大定二  
年詔忠義以丞相總戎事居南京節制諸將忠義至南  
京簡閱士卒分屯要害戒諸將嚴守備使左副元帥志  
寧移牒宋樞密使張浚其略曰可還侵地各守畫定疆  
界凡事一依皇統以來舊約帥府亦當解嚴宋宣撫使



張浚復書志寧曰疆場之一彼一此兵家之或勝或負  
何常之有當置勿道謹遣官寮敬造麾下議之是時已  
復泗壽鄧州忠義使將士擇善水草休息且牧馬俟來  
歲取淮南初世宗詔諸將由泗壽唐鄧三道進發宋人  
聞之即自方城葉縣以來燒夷田野使無所芻牧忠義  
命唐鄧道軍芻牧許汝間三年忠義入奏事遂以丞相  
兼都元帥無何還軍中忠義與宋相持日久慮夏久雨  
弓力易減豫選勁弓萬於別庫及赴闕議事宋將李世



輔果掩取靈壁虹縣及宿州忠義使人還汴發所貯勁  
弓給志寧軍遂大捷竟復宿州忠義還以書責宋同  
知樞密院事洪遵計議官盧仲賢與志寧書約為叔姪  
國歸侵地忠義馳奏請定書式詔諭之曰若宋人歸疆  
歲幣如昔可免奉表稱臣許世為姪國忠義凡七貽書  
宋人宋人他託未從忠義移大軍壓淮境遣志寧率偏  
師渡淮取盱眙濠廬和滁等州宋人懼而世宗意天下  
厭苦兵革思與百姓休息詔忠義度宜以行四年正月



忠義奏請俟秋涼進發詔從之宋使胡昉以右僕射湯  
思退書來宋稱姪國不肯加世字忠義執昉留軍中答  
其書使使以聞詔曰行人何罪遣胡昉還國邊事從宜  
措畫及圖克坦克寧取楚州世宗下詔進師於是宋知  
樞密院周葵同知樞密院事王之望與忠義書

按周葵王之望

書據金史交聘表云係與忠義書而本傳晚載今據增輯

一一如約和議始定宋遣

試禮部尚書魏杞宗信軍承宣使康潁充通問國信使  
取到宋主國書式并國書副本宋世為姪國約歲幣二



十萬兩匹國書仍書名再拜不稱大字五年正月魏杞  
康滑入見其書曰姪宋皇帝昏謹再拜致書於叔大金  
聖明仁孝皇帝闕下魏杞還復書叔大金皇帝不名不  
書謹再拜但曰致書於姪宋皇帝不用尊號不書闕下  
和好已定罷兵詔天下以左副都點檢完顏仲為報問  
國信使太子詹事楊伯雄副之忠義奏官軍一十七萬  
三千三百餘人留馬步軍一十一萬六千二百屯戍帝  
以屯戍太多命選馬一萬二千選軍一萬五千及簽軍



一萬與舊軍通留六萬以宋國進到歲幣悉賞諸軍三月詔丞相忠義先還左副元帥志寧右監軍宗敘留敘南京餘官非急用者並勒還任忠義朝京師帝勞之曰宋國請和偃兵息民皆卿力也拜左丞相兼都元帥六年卒謚曰武莊忠義動由禮義謙以接下尤敬儒者善御將士能得其死力及為宰輔知無不言十一年詔曰故左丞相忠義族人及昭德皇后親族人材可用者左副點檢烏庫哩元忠體察以聞二十一年帝思忠義功



勒銘墓碑泰和元年圖像衍慶宮配享世宗廟庭子揆  
揆本名臨喜少以世胄選為近侍奉御大定十五年尚  
韓國大長公主擢器物局副使特授臨潢府路哈沙阿  
河世襲明安厯殿前左衛將軍罷職尋起為灤州刺史  
改蠡州人為兵部侍郎大理卿刑部尚書章宗即位出  
為泰定軍節度使改知臨洮府事以政蹟聞升河南路  
統軍使陝西提刑司舉揆剛直明斷獄無冤滯禁戢家  
人百姓莫識其面積石洮二州舊寇皆遁商旅得通於



是進官一階仍詔褒諭明昌四年坐嘗私譽永蹈免死  
除名未幾起為同知崇義軍節度使事以戰功遷西北  
路副招討復以戰功升西南路招討使兼天德軍節度  
使復出禦邊嘗轉戰出塞七百里至齊呼勒圖而還詔  
褒諭遷一官仍許其子安貞尚邢國長公主揆沿徽築  
壘穿塹連亘九百里營柵相望烽候相應人得恣田牧  
北邊遂寧召拜參知政事改授中都路額特赫格們世  
襲明安進拜尚書右丞尋出經略邊事還拜平章政事



封濟國公泰和五年宋人渝盟以揆為河南宣撫使揆

至汴蒐練將士軍聲大振時諜者言宋增戍本虞他盜

而宋三省樞密移牒又皆以鑄點邊臣為辭

按金史本紀載金罷

宣撫初係為宋所欺本傳乃云宋人服罪而罷司未得其實今據增輯

於是罷宣撫司召

揆還六年宋人復數路來侵取泗州及靈壁圍壽春命

揆為右副元帥以討之揆至軍前分遣將士禦敵復取

臨淮蘄縣而符離壽春之圍亦解去帝再遣使持詔褒

諭賜賚甚厚宋人既退帝欲進討乃召揆赴闕宴於慶



和殿特收其次子寧壽為奉御密授以成算俾還軍十

月按章宗本紀泰和六年十月庚戌平章政事布薩揆總諸道軍南伐考宋元通鑑及完顏綱穆廷薩克達

傳皆同此誤作十一月今據改揆總大軍南伐分兵為九路進揆以行

省兵三萬出賴壽至淮宋人拒水南揆密遣人測淮水

惟八疊灘可涉即遣鄂屯驤揚兵下蔡聲言欲渡宋帥

何汝礪姚公佐悉銳師屯花靨以備揆乃遣右翼都

統完顏薩布先鋒都統納喇邦烈潛渡八疊駐南岸揆

麾大軍直壓其陣敵皆潰走遂進奪賴口下安豐軍攻



合肥取滁州盡獲其軍實帝遣使諭之曰前得卿奏我  
軍屢捷度彼之計乞和為上如使奉表稱臣歲增貢幣  
縛送賊魁還所俘掠一如所諭亦可罷兵既而宋帥丘  
密果奉奏書乞和揆諭而遣之復進軍圍和州敵以騎  
萬五千駐六合揆偵知之即以右翼掩擊斬首八千級  
進屯瓦梁河以控真揚諸路乃整列軍騎沿江上下畢  
張旗幟於是江表震恐宋真州兵數萬保河橋復遣統  
軍赫舍哩子仁往攻之分軍涉淺潛出敵後敵見之大



驚不戰而潰斬首二萬餘級生擒其驍將劉佺常思敬  
蕭從德莫子容遂下真州宋復遣陳瑋告和揆以乞辭  
未誠徒欲緩師却之宋人乃決巨勝成公雷塘渚積水  
以為阻盡焚其廬舍儲積過江遁去揆以方春地濕不  
可久留遂振旅而還次下蔡遇疾七年二月卒諡武肅  
揆體剛內和與物無忤臨民有惠政其為將也軍門鎮  
靜賞罰必行與士卒同甘苦人樂為用所至皆因糧於  
敵無餽運之勞故為一代名將



烏凌阿暉本名摩囉歡明德皇后兄天眷初充護衛以  
捕宗磐宗雋功授忠勇校尉累除布沙堪羣牧使謹畜  
牧不事遊宴孳產蕃息進秩改特們羣牧使世宗即位  
除中都兵馬都指揮使將遣使於宋以暉嘗私用官錢  
五百貫乃數其罪而罷之遣高忠建往遷都點檢兼侍  
衛親軍副都指揮使卒以第三子天錫世襲納琳河明  
安親管穆昆

富察鼎壽本名和尚上京和碩河人欽懷皇后父沉厚



有明鑒通契丹漢字長於吏事尚熙宗女鄭國公主累  
官器物局使大定二年加駙馬都尉出為蠡州刺史濬  
州防禦使有惠政歷泰寧橫海軍節度使入為左右宣  
徽使授中都路溫國瑄山明安和碩穆丹世襲穆昆改  
河間尹號令必行豪右屏跡有宗室居河間侵削居民  
奏徙其族於平州郡內大治卒官明昌三年贈太尉越  
國公鼎壽既世連姻戚女為皇后長子布卜蘇凡三尚  
定國景國道國公主寵遇如此未嘗以富貴驕人當時



以為外戚之冠

圖克坦思忠字良弼本名寧慶曾祖薩布尚景祖女從  
太祖伐遼戰歿於臨潢之渾河父賽音尚熙宗妹為吉  
爾丹羣牧使幹罕擾北邊與戰死之贈金吾衛上將軍  
思忠賦性寬厚通敏有才頗通經史世宗在潛邸撫養  
之年十二從在濟南與姻戚公子出遊有醉人腰弓矢  
策馬突過諸公子怒欲鞭之思忠曰醉人昏昧何足責  
其人行數十步忽執弓矢思忠恐欲傷人馳奪其弓弛



而還之事聞嘉有識量由是常使侍側尚皇弟二女唐國公主世宗即位從至中都軍國庶事補益良多永定元年拜殿前左衛將軍二年加駙馬都尉卒贈驃騎上將軍仍授其子鐸武功將軍世襲中都路溫圖瑯穆昆按此下原有國克坦鐸烏凌阿復二傳鐸尚熙宗女濬國公主仕終臨海軍節度使復尚世宗女宛國公主仕終絳陽軍節度使並無事蹟足錄今刪

烏庫哩元忠本名額哩頁其先上京特卜庫人父額琳尚太祖女畢國公主元忠幼秀異世宗在潛邸以長女



妻之後封魯國大長公主從海陵南伐世宗即位太保  
昂遣元忠朝於行在授定遠大將軍擢符寶郎諭之曰  
朕初即位親密無如汝者侍從宿衛宜戒不虞遷殿前  
左衛將軍從世宗獵帝欲射虎元忠諫止之轉左右副  
都點檢坐家奴結攬民稅免官大定十一年復舊職明  
年升都點檢遷知大興府事有僧犯法吏捕寘獄皇姑  
梁國大長公主屬使釋之元忠不聽世宗嘉之秩滿授  
吏部尚書以其子誼尚顯宗長女薛國公主十八年

按



傳尚在二十一年此載在十八年以前又諡傳作廣平郡主加封鄭國長公主今諡傳已刪附本傳之末而識其互異于此擢御史大夫授薩巴山世襲穆昆以左丞相赫

舍哩良弼薦拜平章政事封任國公進右丞相策論進士之科設元忠贊成之世宗將幸會元忠諫不聽出知真定府尋復相位世宗欲覽上京城元忠曰此邦遭正隆軍興百姓凋弊陛下休養二十餘年尚未完復況土性疎惡斃之恐難經久風雨摧壞歲歲繕完民將益困矣駕東幸久未還元忠奏曰鑾輿駐此已閱歲倉儲日



少市價漸貴禁衛暨諸局署多逃者有司捕寘諸法恐傷陛下仁愛世宗嘉納之尋出為北京留守移知河間改知彰德府卒元忠素貴性粗豪而內深忌又所至不能戢奴僕世以此為訾云子誼累官御史大夫至寧初以謀逆伏誅

唐古貢本名達格太傅阿里子尚世宗第四女吳國公主授駙馬都尉累遷兵吏禮三部尚書會大理卿闕左丞張汝弼舉西京副留守楊子益法律詳明帝曰子益



雖明法而用心不正豈可任之以分別天下是非大理  
須用公正人右丞鈕祐祿噶達爾舉貢可任遂以命之  
大定二十八年拜樞密副使章宗立為御史大夫會生  
日宴客犯夜禁解職尋復樞密副使進樞密使封莘國  
公改封蕭再上表乞退優詔許之泰和二年卒

按此下原有烏

凌阿琳傳無事  
實足錄今刪

圖克坦公弼本名錫林河北東路算卓和明安人父富  
均努尚熙宗女終武定軍節度公弼尚世宗女息國公



主為器物局直長轉副使章宗秋山射虎虎怒突而前  
侍衛皆避去公弼不動虎亦隨斃詔責侍衛而慰諭公  
弼除濱州刺史累遷知大名府事時伐宋軍興有司督  
逋租及牛頭稅甚急公弼奏軍士從戎民亦疲弊可緩  
徵以紓民從之大安初知大興府事讞武清盜疑其有  
寃已而果獲真盜歲餘拜參知政事至寧初拜平章政  
事封定國公貞祐初進拜右丞相罷知河中府厯定國  
軍節度使同判大睦親府事興定五年卒諡恪愿



圖克坦銘字國本賜名重泰祖貞別有傳父特進涇國

公按圖克坦貞三子多博和慎思實都爾固章宗時俱贈鎮國上將軍銘為貞之孫而傳但載其父為特進

涇國公亦係封爵未詳何人之子

銘性重默寡言粗通經史事母盡孝

大定末充奉御明昌中累官兵部郎中改右衛將軍出

為永定軍節度使移河東北路按察使轉運使大安三

年改知大名府就升河北東西大名路安撫使大名荐

饑重困銘乞大出交鈔以賑之崇慶初移知真定府復

充河北東西大名路宣撫使至寧元年九月奉迎宣宗



於彰德府拜尚書右丞出為北京留守以路阻不能赴  
貞祐二年卒

圖克坦肆喜哀宗皇后弟天興二年正月辛酉夜按天

年史文誤作正大九年辛酉誤作丁酉下文丙寅丁卯  
誤作壬寅癸卯按正大九年哀宗尚未幸歸德何緣有  
迎兩宮之事是年正月丙午朔以干支推之月中並無  
丁酉日本紀載崔立之變在戊辰日此處作癸卯之明  
日俱誤今並  
據本紀改與內侍馬福惠至自歸德時河朔失利京

城猶未知二人被旨迎兩宮入奏二相及烏克遜納紳  
諫不可行肆喜作色曰我奉制旨迎兩宮有敢言不行



者當以別敕從事矣二相不復敢言行議遂決丙寅夜  
兩宮騎而出至陳留見城外火起疑有兵馳還丁卯入  
京頓肆喜家少頃還宮明日崔立變肆喜珠嘉塔  
克實布塔克實布之父耀珠肆喜妻完顏氏以忠孝卒  
九十七騎奪門而出至歸德帝驚問兩宮何如二人奏  
京城軍變不及入宮帝曰汝父汝妻獨得出耶下獄斬  
於市

欽定續通志卷五百六